

西
堂
詩
集

自序

予自丙申秋北平罷官歸卜築先人敝廬之側
成因咏少陵看雲杖藜之句取以名之計居草堂者二
十一年其間再上長安一遊閩越以至恒山之陽榆關
之右三衢之麓青海之濱近則秣陵邗溝驥沙乍浦跋
涉於道途棲遲於羈旅者數數有之然其偃息草堂之
中者十得六七焉則終爲草堂之人而已迨戊午應
召于京橐筆史館者五載迄癸亥始得引疾還里乃瞻
衡宇草堂無恙也然而風景不殊俱成陳迹音容如在
已作古人每一念及俯仰流連未嘗不感歎而繼以泣

也因抽篋衍得所著詩若干首刪而錄之以誌歲月爲
看雲草堂集嗟乎予之爲此亦旣勞且憊矣今夫雲之
爲物朝舒暮卷忽聚忽散白衣蒼狗變幻不常然皆出
於無心則看雲者亦何心之有哉人生百年光陰不可
把玩升沉離合偶然相遭轉盼而失與浮雲之過太虛
何異而或者執爲實相以其悲愁思慮日爲形役甚無
謂也夫世事遷流且等儻忽而况區區章句之末又何
足當泰山之膚寸也哉陶隱居云只可自怡悅不堪持
贈君請借二語以題我草堂之詩

康熙甲子三月三日

看雲草堂集卷一

長洲尤 侗

自丁酉至戊戌止共詩六十七首

萬峰看梅宿剝石禪師方丈有贈

東風初解凍玉榰發新葩我夢萬峰好偶汎橫塘槎茲
山信奇特竦峙具區涯煙波邈浩蕩泉石並清嘉宮殿
參星斗梵唄驚龍蛇大衆皆林杙我佛正趺跏粵聞蔚
老人拄杖開泥沙一燈遞照耀百草爭萌芽剝公鑒新
幢鋤斧成鏤釘登壇鼓大音提唱振幽遐我來叩丈室
道風動袈裟餉我江西餅飲我趙州茶導我無生話風

幡靜無譁我亦聊復爾打鼓弄琵琶

黃檗偈打鼓弄琵琶相逢兩會家

顧恨頑鈍質出處多參差關河日行役風雨晚歸家一
生蜂穿紙萬事雉羅罍每思離五蓋何處覓三車安心
問刹利杜口學毘耶有志苦未逮彈指恒悲嗟此行非
求法大意看梅花獨無靈雲悟空對影橫斜

贈化雨上人

上人陸氏處實介弟

家世本儒冠從師尚少年遂持菩薩戒還勘老婆禪卓
筆書無字彈琴響沒絃湖山歡喜地何用哭蒼天

贈物外上人

上人張氏棄諸生辭婚出家

青衫早解脫紅粉並消除肩上七斤布手中百丈書曉

參風籟寂夜定月光虛萬樹梅花發拈來定起予

贈越中臧湘游

臧子猶儒者元機深自藏排雲叫閭闔撫劒禮東皇鸞
鶴隨彤管風雷護石牀素書餘幾笈可否授嵇康

送友人守台州

遙想天台路仙遊尚未遐山僧扶蓋竹溪女倚桃花畫
戟臨丹宅飛泉入曉衙知君作賦罷手弄赤城霞

送宋右之編修入都

早乘青雀舫去直紫微垣天子臨南海詞臣進北門
燃藜蝌蚪見視草鳳凰鸞若問榆關客爲言今灌園

欽序三四十初度長歌爲壽

與君同甲子少君三月餘一日復一日四十如須臾追
憶平生兩童稚比屋連牀並嬉戲簸錢鬪草靡不爲射
覆彈棋亦嘗試中間一別各茫然酒賦琴歌風雨天寂
寞揚雄不自得飄零庾信坐相憐故國山河驚戰鼓琵琶
千歲高麗舞投筆看君臥草廬躬耕帶索良辛苦金
石聲寒滿天地慷慨當撻鐵如意尚求館穀飽妻孥且
事雕蟲傳方技人生貧賤奚足哀所貴有道與多才圖
書自我青玉案車馬空爾黃金臺君不見同學故人輕
作客索米三年無恩澤一朝失路委泥沙如許頭顱復

何益以此把酒長歌壽乃公笑問使君與操誰英雄

程翼蒼枉飲草堂却贈

長安大道日鳴珂吾子高齋自嘯歌
禁燭論文書不律宮袍貰酒飲亡何
好風深樹交黃鳥新雨荒園長碧蘿
欲共先生醉吟去古來詩卷左遷多

初度偶成呈同庚諸子四首

歸去來兮又一年敝裘短髻各蕭然
剛留丹管堪呵壁未買黃牛得種田
杖節敢希康樂貴

桓公云謝榛四
十必擁旄杖節投

簪深愧隱居賢

陶公云仕宦四十
左右卽拂簪高邁

追思風雪榆關日負

曝柴門亦自憐

少小鈔書浪得名中年學道漫無成尚遺井臼愁妻子
漸廢寒暄怪友生萬卷豈能呼太乙一杯差可勸長庚
便應披髮吳門市日送浮雲入漢京

關山烽火近何如放逐猶存舊草廬劉峻窮惟辨命論
嵇康懶少絕交書槐陰四月啼黃鳥梅雨三江出白魚
俯仰酒樽殊不易諸公何以答居諸

平生踪跡總蹉跎搔首青天奈爾何蒲柳風霜常苦晚
蟪蛄日月已嫌多神銷十載山陽笛夢斷三生紫玉歌
老我閒身無住著一龕燈火事頭陀

夏日閒居雜咏八首

嘗慕君公避世偶同摩詰掩關日月自來壺裏山川只在壁間

深源且束高閣幼輿宜著山岳古詩擬續十九醇酒或醉貳參

南面百城足矣北窓一枕悠然游戲儘教化蝶呼號巨耐鳴蟬

整日科頭林下有時赤脚池中臥讀莊生秋水行歌宋玉雄風

刷草便通樵徑開門恰對田家隴上看行秧馬陌頭聽踏綠車

驚吹尚餘兩部柳腰正好三眠短歌聊復爾耳高臥亦
自欣然

消摩自可愈疾談笑亦足忘憂半枕周秦行紀一枰吳
越春秋

半雲半雨時候一丘一壑襟期且躲天邊趙盾休惹門
外元規

贈女貞觀許鍊師辟穀詩四首

留侯昔從赤松子許史今生萼綠華應向天台山上去
桃花和雪煮胡麻

飛瓊小字註丹霞裙帶長封勾漏砂閒笑蘭香十八九

鈿車輕易到人家

芙蓉鶴氅太真冠道伴相攜吳彩鸞

吳亦女冠

夜半朝元禮

北斗天風微動玉笙寒

仙壇盤鬱接清都瑤草金莖開有無只恐碧天乘霧去
何年鳥爪返麻姑

口占贈女伎鳴臯

懶撥琵琶唱懊儂和衣睡起枕痕紅相逢借問家何處
笑指人煙橘柚中

羅芸臯副使袁丹叔太守招游柯山

此山特以石梁奇駕海何年鞭至斯散騎正當炎日卓

披襟時有好風吹崩崖俯瞰巔巖谷落葉紛飛偃寒枝
盡說仙人柯已爛漫勞吾輩看殘棋

雨泊京口

萬櫓喧江口孤舟倚寂寥秋颺忽墜葉夜雨暗隨潮鐵
甕埋千古金山畫六朝悠悠行路客回首愧漁樵

憶昔

憶昔南朝建業秋北來萬騎打揚州將軍戰血塗金鼓
仕女粧梳委玉鈎何處吹簫新鬼哭幾年折柳故宮愁
而今大有人家在點點紗燈上酒樓

塗中歎所見

黃門戮死西朝市妻子長流遼海東此地銀鑄啼夜月
當年笳鼓發秋風華亭鶴唳聞何晚金谷花飛看未終
萬事寒翁憂失馬千秋高士想冥鴻

打關行

唧唧復喧喧羣呼打關門關門百尺逆流湧傍人遙望
已色動大船賈勇獨當頭小船排比相接踵持篙牽纜
衆工急估客家奴爭助力前者鞠躬若角奔後者背負
仍屹立忽然入口破浪開兩崖滾滾聞鳴雷水吞石齒
舟鬪急欲行還却幾徘徊旗竿亂颭金鼓震鷁首昂然
竟前進逸如疋馬驟脫韁猛似三軍齊陷陣側身一卸

千丈強掉頭曳尾氣洋洋頃刻蒼黃誠交急此時輕快
亦莫當雙篷高掛櫂歌起沆漭黃河秋色裏魚龍踴躍
大王風煙光澹蕩靈妃雨船頭鷄豕賽河神長年泥飲
清河春却話開口風波惡岸上翻憂舟中人老夫大笑
此何畏平地風波驚十倍起歌小海木腸兒搔首青天
同一醉

漕船行

五日過一閘十日過一關問君濡滯何爲爾積水以待
漕船還漕船峩峩排空來影搖白虹聲如雷官船逡巡
不敢進客船急向兩崖開昔年曾見漕船上今年又遇

漕船回漕船回時猶自可漕船上時驚殺我會河水淺
青草生日燒三伏紅于火閘門高閉溜潺潺篙師繫纜
垂頭坐坐等漕船開始開舳舨巨塞中流枕其船重大
皆千鈞淮鹽蘇酒多包裹睥睨椎司不敢呵鞭撻划工
無處躲使氣便說有漕規一呼羣起無不爲茶梁木筏
隨汝取米市魚牙受汝虧衆船亦羨漕船樂不惟醉飽
且施威默思朝廷養此物轉餉本供軍國乏今費一石
致一斗國用日虛民日竭運弁如狐軍如虎下倉講兌
氣莽鹵踢斛淋尖願指間立破中人千百戶縣官難與
伍長爭欲爭反愁漕使怒卽今吳中穀價賤意欲折乾

寧論估索錢不留鷄犬存缺米但云鼠雀蠹腐爛漂沒
亦不憂敲朴糧長仍賄補嗚呼小民如此困催科一歲
租入有幾何畊田輸賦豈敢少奈供此曹魚肉多君不
見武侯治蜀屯田平木牛流馬真良圖

題金龍大王廟

王姓謝宋人國亡投水死

河伯曾聞楚九歌卽今瓠子不揚波將軍飛輓牽牲入
估客張帆漚酒過雲外旌旗播孔雀翠宮中簫鼓舞鼉鼉
五湖四海猶鱗甲獨禮忠魂對汨羅

吳城夜泊

曠野孤舟宿黃河終夜聲天空連楚甸地僻尚吳城遠

樹高低火荒村斷續更馮夷可共語擊鼓壯行旌

韓莊早發

是夜遇天士家兄始寄家信

理楫明星內波聲亂大風鄰檣接暗火岸草遞鳴蟲骨
肉悲岐路音書慰斷蓬故鄉休入夢曉起已山東

兵船二首

八旗方轉戍萬國尚橫戈
瓊帳攜家口樓船下大河孤
兒披鎧甲小婦點酥駝此日從軍子無愁出塞歌

自是青樓女相從鐵甲軍
新粧貂鼠帽舊繡鳳凰裙
酪酒頻年醉饒歌徹夜聞
明朝故鄉路愁絕渡江雲

讀杜詩竟題二十韻

網禽遺孔雀采玉失琅玕天寶多鴻筆杜陵老鶚冠文章無一第戎馬得微官慷慨道難合流離志未殫折腰依太華回首望長安久滯秦關苦孤羈蜀道難身幾鸚鵡續血與杜鵑殘有酒親朋共無衣妻子單關心悲道路動色慰盤餐垂老空山餓長眠大水寒鮫宮疑翠蓋夢澤想漁竿草閣虛蕭瑟詩篇付渺漫才名從古忌墨妙幾人看豪氣歸牙蘂風流信綺紈朱門擁錦瑟白馬走金丸書客貂裘敝琴堂魚釜乾浮名遭棄擲薄俗受譏彈世亂憂千出吾衰病百端王維終藥餌李白亦波瀾自昔多搖落匪予獨慨歎

望嶽

夙昔向平志名山恣游衍中年嬰塵網抗策邈難踐茲
行濟河濱始得岱宗半近翠瞻已周遙青望不斷陰風
散五松陽景浮三觀疇昔封禪書黃農迄秦漢玉步忽
已移金泥誰能辨惟有仙人飛白雲弄昏旦我欲往從
之惜無凌風翰一爲梁父吟俯仰發悲歎

漫興四首

蒼蠅日聚族與我同一舟麾之不肯去騷擾若爲讐昨
夜秋風起吹落不可求塊然獨我坐炯炯空雙眸

野鵲羣呼噪兒童皆喜聞孤鴉一開口彈射爭紛紜愛

憎亦有命吉凶從何分不鳴人則已足以戒奇文

蔓草生田中自謂擇土嘉良苗雖見侵鋤刈亦先加榮
枯自天賦不在滋汙邪君看空山內蕭葛長如麻

吾聞海大魚其口能吞舟誤入小澤中進退不自由置
網紛交加舉尾失其頭烹割雖尚遠枯槁已足憂安得
雷雨作送爾歸洪流

臨清阻風

水順卽風逆盈虛理亦然逆流猶競渡風急竟高眠落
日江東樹青山薊北煙鄉心兼旅思搖蕩兩無邊

又見

又見艨艟下傳呼出大兵八閩飛白羽二廣

楚師名

走紅

縷牛鹿編披甲貔貅配壯丁排空天馬陣匝地水犀營
月黑雕旗動霜清畫角鳴先聲雖不戰殺氣已無生浪
破魚龍亂村喧鷺鴨驚滄州屯萬騎赤縣閉孤城父老
移家去官曹負弩迎將軍操左鉞客子避前旌小艇無
容處除非陸地行

舟中悶極雜寫鄙懷得五十韻

正值三秋晚那堪一水長舟中閒日月夢裏老星霜沾
酒雖盈缶攤書亦滿牀醉醒嘗邑邑歌歎總茫茫養疾
朝眠藥消憂夜坐香顏唐弛櫛沐顛倒任衣裳飽食心

無用端居氣不揚
倦來惟坦腹
險過屢迴腸
楊子連牛渚
黃河壓馬當
風高棲葦荻
夜黑渡津梁
稅貨三關急
爭纏八閘忙
聞鷄出函谷
如象上瞿唐
北下漕艘衆
南征戰艦強
藍旗湖廣戍
白旆浙江幫
小縣供牽綽
荒村呼打糧
居人驚閉戶
行子戒垂堂
世路如臨谷
生涯渺望洋
出門秋月白
中道菊花黃
夕露飛鴻羽
晨風瑟素商
去年曾羈旅
兩漿下錢塘
茲歲仍漂泊
孤帆過壽張
光陰隨冉冉
踪跡漫遑遑
身賤甘行役
家貧輕故鄉
遠游愁白髮
久別損紅粧
辛苦烹龍伏
艱難典鷓鴣
謗書方離齷
官檄又倉皇

時子所作鈞天樂
意緒夢蠶繭肝

腸割劒鋒百年催皓首四海寄空囊三上長安道一歌
出塞行頻年騎瘦馬此日繫危檣苦蓼蟲猶食驚弓鳥
未翔折腰羞北地強項畏南陽放逐同梁苑行吟學楚
湘侯門多水火宦海幾滄桑朝服橫東市囚車滿夜郎
招搖指武庫貫索守文昌盤水裁中間胡椒籍左璫黃
符縛債帥白馬接降王露布來殊徼宣麻出未央公私
皆旁午進退獨周章索米誠堪愧積薪還自傷窮思豪
士賦老憶少年場趙李稀經過應劉久喪亡金貂馳驛
路松柏拱山岡逝者觀于水時哉問彼蒼塞翁知失馬
臧穀悟亡羊遯世宜披髮埋名欲賣漿悠悠嵇子懶咽

咽阮生狂對此誰能遣言之不可詳把詩增涕淚倚檻
永徬徨

南陽九日

重陽九日泊南陽何處登高可望鄉零落一身如苦葉
蕭條兩鬢已微霜相思青鏡應蓬首反閉黃花空草堂
濁酒頽然成獨醉秋風濟水正茫茫

秋雪行

河間雪毛大如掌秋風吹之落袤丈古道低迷楊葉村
平川遠映蘆花漿浪打孤舟行不得推蓬起看千山白
髣髴遼西沙磧中短衣驅馬長城窟側望鄉關愁若何

可憐畫閣尚輕羅行人莫唱苦寒曲前路風霜正日多

楊村

雁飛不斷向黃昏哀叫西風迸淚痕此夜高樓迴首望
不知漂泊在楊村

張家灣

往時此地拂衣回白日驚逢暴客來十口倉惶竟欲斷
三年幽憤眼誰開參軍不足當鷄肋安國何能起死灰
七首未酬燕市恨蕭蕭易水至今哀

子于丙申四月去任抵張家灣爲土寇程啓貞所劫
僅而得免啓貞本山海關民犯法當死予補之急逃

入旗下至是挾數十騎來白晝攫行李去一境震駭
莫可誰何也戊戌十月重泊灣口因作此詩至庚子
啓貞入獄殺人更不敢問怨家過登闕鼓

天子震怒逮至部并發其前後罪狀處以極刑傳首邊
庭歿其帑京東百姓無不把酒相賀者卽予可知矣
丁未四月刪詩至此自註

入都二首

三年蓬蓰臥江干神武門前已挂冠久矣飯牛披短褐
胡然策蹇入長安相逢盡是諸先輩適自何來一罷官
慚極翻成開口笑西山佳氣許人看

十年三度到京師風景重新此一時北府惟聞漢將貴
南冠常見楚囚悲
時孫可望降封爲義王
丁酉舉子流徙尚陽堡霓裳夜舞昭
陽殿翠輦宸遊太液池我亦來尋屠狗者典衣醉調酒
家兒

獨坐二首

獨坐空成咄咄書追尋往事暗嗟吁士爲知己死方得
老不如人生亦虛眼熟亂離愁戰馬身閒樵牧夢乘車
秋風嫋嫋憑高望何日佳人聞召予

日月昭昭寢已馳風塵大地去何之消除白髮悲秋賦
孤負青山招隱詩有婦趙人能鼓瑟無家燕市獨吹簫

學書不就還磨劒願結幽并游俠兒

至永平二首

平盧舊游地驅馬復來歸無恙將軍石猶餘公子薇
流水城郭是鳥散吏人稀可識遼東鶴原名丁令威

昔日罷官去單車離塞垣今朝作客至匹馬向關門
活水流急淒淒霜草繁相逢因話舊獨有老僧存

送宋荔裳兵憲自永駐薊

黑水燕河路黃沙孤竹城軍容觀細柳廟畧問營平鎖
鑰兼三協屏藩夾兩京

燕京盛京

五花榆塞出千騎薊門行

鹵簿車前導鐃吹馬上聲朔風搖大纛涼月引高旌勲

業彤弓起文心緩帶生前驅慚小吏無筆賦從征

薊州小病

及子迴馬首猶爾滯漁陽一病家千里孤燈淚萬行道
塗橫枳棘天地日冰霜苦憶柴門臥山妻檢藥囊

往真定

東歸自遼水南去又恒陽何日辭驢背當天逐雁行敝
裘時沐雨華髮早添霜千里綿綿道愁心更較長

墜馬

男兒一身貧賤不自保麻鞋踏破關山草馳傳不擁相
如節叱馭却走王陽道長安駿足貴人騎我買一馬瘦

且老風沙疾驅張掖門滑擦一交齊蹋倒起來瞪目不
自得旁觀拊掌增懊惱扶掖而上如登山夷于右臂執
鞭難入舍休沐覺無力自持匕箸誰加餐珊瑚之管不
可搦明月之弓焉能關長老袒肩坐亦苦夫子曲肱寢
何安君不見杜陵醉後傷其足猶云快意多所辱我今
不醉復不快塗窮翻遭予馬蹶哀哉我生命不猶四肢
不得蒙咻噢隱忍奔馳六百里頓轡暫息恒山麓醫者
賈生三折肱刮骨能出將軍鏃右之右之日撫摩塗以
神膏漸平復雖則平復旣荼毒後車宜戒前車覆不知
一跌亦偶然蹶者趨者豈駢逐知章大醉似乘船王良

善御或折軸仰天一笑策馬回塞翁安知非爲福

邯鄲道

十年三走邯鄲道塵夢茫茫尚未曉臥客祠前白日斜
行人馬上朱顏老野店淒涼感定婚魚山消息竟誰真
何時攜取青絲履來訪秦樓鼓瑟人

冬至夜在成安縣寺中作二首

去冬留太末此日寄成安作客恒千里思家起百端衰
年難遣病寡酒不生歡欲問江南夢關山奈月寒

孤城水浸後古剎土崩餘凍樹喧麻雀荒燈照木魚旅
人悲歲暮永夜惜離居檢盡西來藏寧如尺素書

至日飲沈東生署中

主人能好事令節且淹留
刁酒頗醺醪巴歌強嚅囁
風塵寒短褐歲月老諸侯
更說家鄉信秋霖禾未收

大雪張廣文攜酒來飲

酒錢何處乞大雪自提壺
竹葉殊佳甚梅花得嚼無
凍雲低睥睨飢鳥入浮圖
杳靄關山道遙憐我僕痛

時遣小奴

于長安

登二祖說法臺

此地猶存說法臺
碌磚露柱半塵埃
傳衣不見天花落
廢座空聞龍象哀
漳水東流殘雪積
吳門南望暮雲來

客愁無處安心得立盡斜陽策馬回

一刪語二祖云
我與汝安心竟

述役

季冬寒氣勁籬間吹感栗冰澤鮮游鱗霜林斷飛翮如
何馬上子辛苦事行役鷄鳴披衣起戴星履荒陌升曦
慘不揚陰霧障千尺積雪載大塗驚蹄走滑突四野曠
無人但見狐兔跡悲風撲面來鬚眉直如戟日暮息村
茅草具惡難食薄酒不熱顏布衾懷鐵石伏枕苦夜長
挑燈坐歎息歎息亦何爲中情自煎迫山河日以邈家
鄉日以隔音書尚阻修何由見顏色仰視南飛雁哀鳴
使心惻

博興除夕二首

私自憐今夕羈棲在薄姑起彈雙劍缺坐對一浮屠海
嶠冰霜重江關鴻雁無官廚頻餉酒誰與汎屠蘇

前浮屠塔

也此浮屠僧也

僕夫皆歎息禁我不凄然水擊三千里雲游九十天客
衣寒獨夜佛火了殘年暗想橫波淚空牀畫燭前

看雲草堂集卷二

長洲尤 侗謨

自己亥至庚子止共詩七十八首

飲施愚山學使署中長歌贈之

驅馬三周華不注青峰獨插青天住杖策一尋釣突泉
銀河倒噴聲濺濺齊魯山川首歷下其秀鬱爲古作者
千載復來宛陵公手挽東流鼓風雅獨樹軒前春鳥鳴
張燈揖客紫露青州酒名傾酒氣拂拂十指出聽君口吻煙
霞生君云蓬萊見海市恍兮忽兮萬象起貝闕珠宮乍
眩眸霓旌翠蓋纔彈指繼云東上岱宗壇鷄鳴日觀扶

桑寒五大夫者猶芻立磨崖之碑參天看又云孔林曾
再拜數仞宮牆大無外四壁管絃音未希一堂劒履容
如在登山觀海遊聖門我聞舌橋難爲言怪君雙眼高
百尺西江吸盡雲夢吞元氣磅礴走鴻筆天地大文風
雨出短歌長吟來鬼神一時海嶽開顏色飲君十斛爲
君賦予亦從茲汗漫去西攀太華北滄溟長攜謝朓驚
人句

送人戍尚陽堡

送君東去戍遼陽忍見囚車滿道旁萬里戈戩歸異域
百年廬墓隔他鄉黃龍塞外青天遠鴨綠江邊白草長

此日分攜成永訣春風吹淚上河梁

咏史八首

天子瑤池奏玉笙只教阿母喚雙成閒來海上採仙籍
又問飛瓊小玉名

霓裳舞罷荔香來近自溫泉賜浴回看甚文書飛燕傳
無端更築避風臺

內官九品職新除手詔鸞車遽尚書殿脚三千盡蛾綠
不知若箇女相如

黃金不惜買良家勅使先封繫臂紗燕支豈是無顏色
爲愛蓮歌出若耶

黃貂帽子白狐裘
瓔珞垂鬟結綵毬
聞說江南高一尺
六宮爭學牡丹頭

吳宮素足楚宮腰
銅雀春風舞二喬
紅豆才人能記曲
綠珠弟子善吹簫

好謝深閨入上陽
早忘涕泣向匡牀
巫山雲雨如今在
枕席還教侍楚王

進賢上賞奉溫綸
爭聘蛾眉朝至尊
應羨廣南作太守
部中偏有綠珠村

喜遇自天上人二首

十載別尊師相逢此一時
形容等衰老踪跡各差池
感

舊增談柄追歡少酒卮憑君舞拄杖聽我唱楊枝

汝從五臺至予自泰山來共作燕中客相期吳下回千巖擊翠竹四月熟黃梅把臂須同去風塵心已灰

清明

盡說清明節旅人尚未知昨宵仍火食隔戶插楊枝積雨沉花信飄風射酒旗高梁橋畔路車馬正當時

高梁橋都人路青處

臨鏡見白鬚一莖戲作

潘岳年三十閒居見二毛況予增老大豈敢怨絲毫隱去已爲晚吟成亦太勢還家示妻子一笑索鉛膏

坡詩鉛膏

洗髮鬢

有感

日閱長安車馬過春光忽忽已消磨人情只在樽前盡
客思偏從夢後多感舊蕭騷看髣髴登高慷慨對山河
平生涕淚行將竭遮莫長歌續短歌

別長安十首

只合漁樵老此身底須辛苦入風塵一官未許因人熱
十口翻成爲仕貧閭闔天高逢鬼謁江湖地遠逐孤臣
非關聖世簪纓短爲有青山待逸民

普天雨露本無涯眨眼誰知雲霧遮親見繡衣持大斧

漫勞玉帳擁高牙君門咫尺疑千里客路東西哭一家
尚沐恩波容隱遜強如放逐向長沙

天安門下集千官呵殿鳴騶夾道看菜市夜歸人寂寂
尚陽家去路漫漫只今上相猶爭坐自古高賢每挂冠
况我更無冠可挂征衫脫却便漁竿

竭來弔古望高臺臺上黃金真可哀一代賢良卜式傳
千秋流涕賈生才諸公袞袞何爲者壯士蕭蕭安在哉
燕市和歌今不見吳門變姓且歸來

相如貰酒鸛鴒裘車騎雍容已倦游作賦不逢楊意薦
著書寧待所忠求

予所著西堂雜組爲
皇上特賞故感及之

故人恭敬誰

青眼新婦淒涼早白頭滌器當鱸渾未慣秋風好上五
湖舟

十年踪跡漫勞勞風雨周游有敝袍短棹獨臨滄海濶
單車直上太行高窮途慟哭誰哀阮荒徑欣奔自擬陶
且待尚平婚嫁畢指揮五嶽屬吾曹

不如歸去不如歸歸去來今知昨非千里壯心天馬下
一朝適意野鷗飛焚書并瘞珊瑚筆解綬先裁薜荔衣
猶有吳鉤別未得酒酣常舞釣魚磯

千載吾師張季鷹秋風鱸膾令人興東方索米飢還甚
南郭吹竽病未能夙昔論交惟白石他年弔客有青蠅

悠悠舉世無知己不獨人言鬼可憎

少年輕薄日紛紜老大傷悲已離羣
誓墓欲追逸少筆絕交重廣孝標文
空山雨雪關門臥清畝飄風植杖耘
回首京華車蓋遠亭亭西北有浮雲

對水城南一草堂時花修竹自幽芳
老妻釀秫藏三斗兒子攤書讀幾行
有客日來談鬼魅先生夜夢見羲皇
出門莫向長安笑曾在長安望故鄉

清涼寺雙檜

何代清涼寺婆娑老檜雙風聲落翠瀑
日影覆華幢豈是來西域長宜臥北窓
白頭僧百歲對汝亦心降

寺有百歲

老僧

濟寧杜甫南池

東道恒留滯南池得偶過清陰生古木
小雨長新荷此老游不再今人詩更多
酒樓呼太白應共爾悲歌在南池側

挽淮南李小有先輩

桂樹王孫去不歸淮南木落雁哀飛
元龍意氣埋空谷司馬文章付釣磯
老病那溝誰挂劍故人吳下盡沾衣
劉伶李白皆黃土悵望秋天墜少微
聞劉長公亦歿

和陳皇士閉關詩

桃笙竹几書一編目送條忽之雲煙有客能歌大石調
呼童爲潑中冷泉靜觀天心欲化蝶厭聽俗語如鳴蟬
乃知避暑無長策高臥以紀羲皇年

寄賀徐公肅狀元

雅號無雙士新標第一人日邊香叱撥天上石麒麟彩
筆飛黃甲宮袍拜紫宸寵承金闕宴喜動玉樓姻故友湯卿
謀爲公肅婦翁芍藥初生夢茱萸更作春是年九月賜第驚傳名藉甚
耳熱到垂綸

南有大江九章章八句

南有大江頌梁將軍也已亥六月海寇入犯將軍討

平之

南有大江亦通于海海邑維崇萑苻所在鯨鯢偕游洪
濤日駭 帝命梁侯汝往敵愾

桓桓梁侯威武鷹揚六韜孔明五伐斯張我聞在昔建
勲朔方旣秉斧鉞鎮是海邦

海邦不靖小醜內訌闢入瓜步豫艫蔽江鐵城旣空石
城將崩飛檄舉烽以元戎

元戎之師如山如壁白羽如荼玄常如墨聞難疾馳不
遑朝食旣至建康鑿門而出

出自白門闐然一鼓奮臂前驅怒如虓虎奪孤則呼塞

旗以舞大風飛揚更縱烈火

烈火炎炎巨浪湍湍追奔及溺掬指滿舷與尸宵遯棄
甲投鞭梁侯燕喜凱歌言旋

雖則言旋我心用棘憂彼潰師犯我崇邑策馬曰歸賈
勇必克挽水洗兵海波如瑟

海水未平 王國震驚海水旣清 王心載寧乃召六
卿露布于京眷顧梁侯錫命有榮

其錫維何祚爾通侯彤弓盧矢錦衣狐裘永保南服爲
國戈矛侯拜稽首 天子之休

贈超上人閉關寫經

春草方交翠吾師正掩關相看惟丈室獨坐卽深山杜
口風塵外安心筆墨間何當詩酒暇攜興訪高閑

機山平二陸讀書處

士衡將門子才畧本儒生感激輕投主麤疎誤用兵青
山猶篆字白恰已埋名遠愧東曹掾秋風飽鱸羹

柰山訪陳徵君故宅

此老久不作人呼麋道人白雲封藥臼碧草臥蒲輪山
贈陶弘景谷傳鄭子真太平通隱貴餘韻感遺民

同史及超太史張伯升明府天士家兄集周裕齋

廣文齋中

先生坐我草堂前沉李浮瓜雜管絃枉矢無文真率爾
圍棋有道亦欣然美人玉案張衡賦繡佛長齋蘇晉禪
及超長齋客散一簾風雨後北窓正可孝先眠

飲梁狝天都督幕府二首

開門揖客大將軍朱鷺饒歌徹夜聞帳下美人彈八尺
壁間壯士饗千斤捲簾驟拂橫山雨撫劍遙空瀚海雲
萬里封侯談笑事燕然我願勒銘文

麒麟圖畫待君侯汗馬餘閒數酒籌一座簪纓吟玳瑁
三更刁斗叫貔貅燈前絲管春雲過雨後樓臺暑氣收
猶記出車歌六月此時戰鼓動江頭

題韓蘄王廟

忠武勲名百戰回西湖跨蹇且銜杯英雄短氣莫須有
明哲保身歸去來夜月靈旗搖鐵甕秋風石馬上琴臺
千年遺廟還香火杜宇冬青正可哀

家人生日漫贈用前韻四首

負戴相於二十年牛衣犢袴尚依然飛蓬自學當窓織
索米難求負郭田南國甘同老子隱東征深念大家賢
內子隨子宦北平秦聲趙瑟聊行樂不用琵琶覓小憐

詩爲癩癬酒爲名費汝紛拏苦勸成林下夫人曾學道
鄴中公子每憂生牽牛磨蝎雌雄甲玉馬金鷄先後庚

予牛生婦
酉生故云 不如吳姬妒秦女閒隨蕭史住瑤京

四十專城愧不如鹿門好逕有吾廬
傭春且舉梁鴻案
上計無勞徐淑書
子夜月中飄桂粟
秋風江畔薦鱸魚
長卿沽酒東方肉
閨閣稱觴古有諸

尚平婚嫁漫蹉跎
擁髻時聞喚奈何
芳草年華愁易老
杜鵑心事淚偏多
徘徊翰墨椒花頌
辛苦流黃采葛歌
看盡盧家三婦艷
香車寶馬錦盤陀

舟中九日

楚歌臨水送將歸
吳俗登高樂事違
竹葉茱萸兩不見
木蘭蘆荻獨相依
漁人江上尊鱸美
野老村前稻蟹肥

孤負秋光成汎宅布帆悵悵倚斜暉

寓海鹽天寧寺

每因作客屏蘭若坐臥閒房見此心
初地樓臺連海濶上方鐘磬入秋深
沉沉苦雨遲黃菊獵獵商風急素砧
已自蕭然人事外獨憐肺病日相侵

贈彭駿孫兼呈仲謀

武原秋色海天來乍見佳人心目開
奕代衣冠傳越絕少年車馬滿燕臺
蒲萄文錦裁銀管玳瑁書籤號玉杯
况有西頭名第五清樽畫燭足徘徊

登天寧浮圖絕頂望海

興至超然到上頭，憑虛蕭瑟見高秋。
諸天冥冥人非想，大地茫茫我亦愁。
俯聽蒼蠅喧萬瓦，遙看白馬走中流。
海神未許探幽窟，倏忽風煙走蜃樓。

同錢武子登秦駐山

孟冬寒未嚴，海山淨如濯。
客懷恣孤往，况乃覲朋樂。
躡屐力旣煩，進艇道仍邈。
雖非縱三驅，聊且駕六駁。
屈曲躋曾岑，盤桓憩蘭若。
朔飈正怒號，巨浪羣噴薄。
天陰叫鵠鷺，潮鳴上鯖鰐。
吐氣象丹樓，飛鹽似沙漠。
遙指一點煙，中流隱城郭。
秦帝昔東遊，茲巒駐行幄。
金革銷榛莽，羽衛化猿鶴。
野廟遺荒村，香火慘寂莫。
木杯何年渡，錫

杖自今卓忍殿宏宿構甘泉出新鑿

破顏開山手闢一泉味甚甘冽

茗

柯超玄箸暫休解塵縛興至憺忘歸景移逝將作急鞭
隨日下短帽對風落平楚散牛羊空林聚鳥雀回首望
餘青暮雲漫寥廓

徐烈婦

用古叶韻

我徂武原周詢故老歲在木鷄數窮陽九銜刀渡江舉
國出走靡不屈膝疇能抗首有丈夫女嗚呼徐母來奔
豐山零雨載道萬騎驅之舍其夫子同二侍者匍伏荒
草前伏駭起卒遇羣醜投畀簪珥竭其囊資胡然相逼
死矢不受格則有肘詈則有口奮身飲刃血濺隴畝二

侍從之承劒殉主免者驚告烈哉未有子求死母夫求
死婦號哭舉屍紅顏如舊風鬟怒髮餘憤赳赳豈無他
人爵祿素飽望塵遙拜乞活恐後視茲巾幘胡顏之厚
又聞干女牽髮使走頭與髮斷髮猶在手康橋之嫂抱
柱固守貫鏃隕河葬十魚笥嗚呼徐母是三不朽君子
表微敢告史右

余太守節母詩

有吳二千石治行漢廷最自稱阿母賢夙稟大家誠弱
齡賦栢舟之死從良配黽勉持單門風雨更明晦恩勤
鞠藐孤口瘖心亦海飲食母所貽詩書母所誨嬛嬛二

小子我征爾斯邁小子教克成阿母養不逮空廢蓼莪
篇焉得護草背苦節世所希彤管庶堪載予聞太守言
改容發深喟峩峩石英山悠悠巖陵瀨山高如母笄水
長如母帶山頽水或涸母節永不壞

黃孝子歌

吁嗟乎黃孝子吾聞江南之去雲南一萬里遙望點蒼
山間以滇池水金馬碧鷄疑有無綠蘿青蛉知誰是中
歷十八番人半羅施鬼盤江惡浪高于天陰洞荒菁隍
虎兇銅鼓鳴畫角起關索嶺頭戰未已巨象磨牙馬積
矢赤燐夜飛白骨壘孝子何爲至于此父兮母兮天一

方重繭追尋敢辭死首一蓋足兩屨朝餐風暮沐雨突
髻鬢顏血泚指白鹽井上石羊語老親驚起兒來矣兒
來拜泣親歡喜觀者太息滿鄰比小弟沽酒婢炊米夜
闌剪燭笑相視望江南歸來只客舍無宿春何以辦行
李懷刺遍走東西逸故吏門生饋筐篚藜杖麻鞋相攜
倚藍輿宛轉荆榛裏風濤顛倒蓬艫底百折千盤悲瑣
尾辛苦扶持甘如薺故鄉無恙柴門啓鷄鳴犬吠人歸
止新婦上堂奉甘旨定省晨昏從此始吳下爭傳黃孝
子吾觀孝子行程五百三十日往來二萬五千里雖云
二萬五千里孝子視之咫尺耳吁嗟乎黃孝子

恭擬

端敬皇后挽詞八首

貴妃董氏

內殿俄崩金鈿車後庭新築玉鈎斜傷心端爲思公子
貴妃先薄命還教慰大家羅袂無聲哀落葉霓裳罷舞
喪皇子憶催花多應喚取吹笙去伴侶重尋萼綠華

在天比翼地連枝不信人生有別離湘渚旌旗歸帝子
吳宮簫鼓葬西施三秋桂殿奔何早五夜蕪香夢尚遲

此日溫泉都化淚春風腸斷浴妃池

去歲貴妃浴于湯泉

苑西空鎖洗粧樓海外誰傳聚窟洲犀盒拋殘金絡索
玉釵敲斷鈿筌篥輕鸞寶帳虛難繫飛燕仙裙去不留
惆悵一聲河滿曲那容天子獨無愁

每侍銅臺奉綺筵，問從翠輦獵平川。
白雲黃竹埋瑤壁，紫塞桃花殉錦鞦。
何日離魂招葉喜，他年外傳寫伶玄。
隴西鸚鵡知人意，數向君王問麗娟。

無復承恩一顧中，蕭條三十五離宮。
香銷荳蔻辭飛燕，枕冷珊瑚負伏熊。
妃子殘眉憐宛轉，夫人小字惜空同。
祇應殯傍昭君塚，青草年年恨血紅。

乍閉哀丘永不春，斷腸素足委香塵。
十眉圖裏思花蘂，一斛珠中哭采蘋。
蓬島有書呼玉女，椒房無鼎卜金人。
凌波去後沉消息，繡枕空勞賦感甄。

得寶猶思相見歡，牽衣長歎別離難。
但經永巷廻車去，

更起昭陵帶淚看銀漢他年應渡鵲女牀此日可飛鸞
瑤華宮裏還春曉悔不修真學女冠

憔悴天顏賦悼亡寒鴉朝夕弔昭陽金釵鈿合無遺信
玉冊香符有贈章帳內神君稱左右殿前孝子列諸王
侍臣齊下羊家淚誅筆何人繼謝莊

盧師菴放生詞十二首

放生去葑水小曹溪惠子坐觀濠上樂漁人舟入武陵
迷春色畫橋西

放生去飛躍總無爭龜向溪廻頻左顧雀銜花去更長
鳴日晚午風輕

放生去極目，海天空釣直。
任從磻叟釣，弦虛莫問楚人弓。
得失看鷄蟲。

放生去留汝，一杯羹釜內。
赦回九子鳥，波中跳出五侯鯖。
小字賜長生。

放生去微細，亦堪矜莫臥。
繩牀撲佛子，常鑽窓紙出蒼蠅。
蛾避剎前燈。

放生去物我，共游嬉適意。
不如胡蝶化，忘機寧使海鷗疑。
細雨戲魚兒。

放生去結社，似香山池上。
鼓琴魚撥刺，陌頭攜酒鳥綿蠻。
窓草不教刪。

放生去懺悔禮團蒲座上談經來聽鶴齋時鳴磬下巢
烏鸚鵡念南無

放生去佛物本同心簞外鱸魚現羅漢鼎中鷄子誦觀
音花鳥滿祇林

放生去龍象悉皈依趙州救得貓兒在馬祖間看鴨子
飛妙法是生機

放生去憂患我生多人壽幾何駒過隙天涯到處艾張
羅自放遠風波

放生去願與萬方同吸盡西江爲沼沚拓開大地作樊
籠三界此菴中